

Date – 16/12/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Governor Dr Hari Babu Kambhampati an zirna sang zawk bel lo, thingtlang kilkhawr zawka awmte tan hna an hmuh theih nana puih a tul thu Mizoram Youth Commission hotute a hrilh.
2. Chief Minister Pu Lalduhoman, Kalphung thar mipui Sorkarin kumkhat chhung chauh pawhin ram rorelnaah danglamna tam tak a thlen tawh a ti.
3. Vijay Diwas - Hnehna Ni pualin War Memorial, Treasury Square-ah Larsap Dr. Hari Babu Kambhampati hovin sipai huaisen, ram tana nun hlantute hriatrengna leh zahna lantir nan pangpar dah a ni.
4. Sri Lanka President Anura Kumara Dissanayake chuan India dona atan kan ram kan phal ngai lovang a ti.

<><><>

GOVERNOR

Governor Dr. Hari Babu Kambhampati chuan Mizoram Youth Commission (MYC) Chairman Pu Malsawmzuala Ralte chu Raj Bhavan-ah kawmin MYC hmalakna hrang hrangte leh hmachhawpte a sawipui.

Governor chuan India ram hmun hrang hranga hnathawh tur remchang tam tak awmte Mizo thalaite'n an hmuh theih nana chak zawka hmalak a tul thu sawiin, zirna sang zawk bel lo, thingtlang kilkhawr zawka awmte thlengin an kumin a phak phawt chuan hna an hmuh theih nana puih a tul thu a sawi a. Qualification leh an tuina azir zela thalai hna zawngte register-a data mumal tak neih fel hmasak a tul thu leh, hna a awm veleha an zawm theih nana lo inhmakhua lawk a tul thu a sawi.

Governor chuan Mizo thalaite chu mahni awm hmun chhuahsan hreh lo tur leh hmun danga hna zawnga chhuah tum turin a fuih a. Hmalaknate zau zawka puanzar a tul thu sawiin, MYC hotute chu Mizo thalaite'n hna tam zawk an hmuh theih nana theihtawp chhuah turin a chah a, puih a tul huna pui tura a inhuam reng thu a hrilh a ni.

He hunah hian MYC Chairman Pu Malsawmzuala Ralte chuan financial year 2024-2025 kal mekah thalai 43 te'n MYC kaltlanga hna an hmuh thu a sawi a. Thalaite hmakhua ngaia Govenor-in State danga hnathawh tur a ngaihtuah sak thin leh tunhnaiah Governor hmalaknaa Sri City, Andra Pradesh-ah Mizo thalai 8 te'n hna thar a hmuh avangin lawmthu a sawi a ni.

<><><>

ZPM

Chief Minister Pu Lalduhoman, Kalphung thar mipui Sorkarin kumkhat chhung chauh pawhin ram rorelnaah danglamna tam tak a thlen tawh a ti.

Vawiina ZPM Gen Hqr Office-a Party office kharna hunah thusawiin ZPM leader Pu Lalduhoma chuan, kumkhat chhungin Mizoram Legislative Assembly ah Speaker kaihruainain Bill 46 pass a ni a, Dan siamthat ngai leh her rem ngai engemawzat siamthat tawh bawk a ni, a ti a. Dan thar Mizoram Private Placement Agencies Regulation Bill 2024 an duang mek a, Mizoram Youth Commission Bill hmangin thalaite tan kawng an sial sak dawn a, Labour Laws 44 vel hman mek pawh mumal zawkin Dan 4 ah an khai khawm dawn bawk a ni, a ti.

Pu Lalduhoma chuan Zu khap burna dan (Mizoram Liquor Prohibition Act) pawh uluk tak leh fimkhur taka ennawn mek a ni a ti a, ram chhunga thil dehchhuahte ngaihlut a nih theih nan Mizoram Preferential Store Purchase Rule 1994 pawh an ennawn mek a, hei hian Sorkar sum nasa takin a humkan beisei bakah hmanraw tha zawk leh tlo zawk neih theih an beisei a ti.

Industrial Policy 2024 pawh an duang mek a, thil siamchhuah lamah nasa taka hmasawn an tum a, Village Council Act hman mek pawh a thar an siam dawn a, Autonomous District council te pawh Dan siamthat ngai engemawzat an siamthat sak tawh a ti a. Sorkar hnathawkte inkaihruaina Service Rules leh Recruitment Rules pawh 63 zet an siamtha tawh bawk a ti a, Aikal lak tih tawpte, Sorkar hnathawk ten hunbi an vawn dikna turte bakah inrenchemna kawngah theih tawpin hma an la a, ram rorelna kalphung a lo dik theihna turin kawng tam takin hma an la mek bawk a, kum khat chhungin Kalphung thar mipui Sorkar hian ram rorelnaah danglamna tam tak an thlen tawh a ni,"a ti.

<><><>

MNF

MNF Party President Pu Zoramthangan sorkar tharah sum leng vak a vang tih sawiin Mizoram sorkarin ni 100 inhlawhna a bat sak chu pe thuai tura a phut thu a sawi.

Vawiina MNF Party Office Mizo Hnam Run kharna inkhawmah thu sawiin Pu Zoramthanga chuan mipuiin krismas leh kum thar hlim taka an hman theih nan sorkar hnathawk hlawh leh thil dang dang pe thuai tura sorkar a phut thu a sawi.

MNF Party hian Martarte hriatrengna Ni Exodus Day an hmang nghal a, minute khat chhung ngawi renga an din hnuah a hu hova tawngtai rual a ni.

Pu Zoramthanga chuan Exodus Day lo chhuah dan sawiin, December ni 16, 1971-ah East Pakistan khawpui Dhaka, tuna Bangladesh ni ta chu India-in a lak tuma MNF headquarters Rangamati, Tuipui zau tak hual vel kara awm, Meilawng 7 hmanga mak tak maia Pathianin a hruai chhuahna Ni anih thu a sawi.

December ni 16 hi India sipaite tan hnehna ni ropui, an hmelma Pakistan tlawmna ni 'Vijay Diwas' anih rualin MNF sipaite tan pawh India lak atanga chhanchhuahna ni ropui a ni a. "Harsatna su turin Pathianin MNF hi a tir atangin a din a, a sut kiantir thin a, kawng lakah a kalsan lovang, a ti.

<><><>

VIJAY DIWAS

India ram hmun dangte rualin tukin khan Vijay Diwas - Hnehna Ni pualin War Memorial, Treasury Square-ah Larsap Dr. Hari Babu

Kambhampati hovin sipai huaisen, ram tana nun hlantute hriatrengna leh zahna lantir nan pangpar dah a ni.

Vijay Diwas pual hian Larsap Dr. Hari Babu Kambhampati chuan hma hruaiin Sipai huaisen martarte zahna lantir nan War Memorial-ah pangpar dahin zahna chibai a buk a. Chief Minister Pu Lalduhoma leh mi pawimawh dangte'n Governor hnung zui hian sipai huaisente hriatrengna leh zahna lantir nan pangpar an dah bawk a ni.

Sawrkar, Civil leh Sipai lam hotute atangin Home Minister Pu K. Sapdanga; MLA Lt. Col. Clement Lalhmingthanga, Padma Shree Hav Lalbiakthanga leh Sawrkar mi pawimawh dangten martarte zahna lantirin War Memorial-ah hian pangpar an dah a ni.

December ni 16, 1971 khan Pakistan Sipai hotu Lieutenant General AAK Niazi leh a hote sipai sing 9 sang thumte chuan Eastern Army Commander, Lieutenant General Jagjit Singh Aurora-a kaihhruai India sipai leh Mukti Bahini tangrual te laka an tlawm thu an puang a. He hnehna ni hi kum tin hman a ni ta a ni.

<><><>

ZPM MDC's MET GOVERNOR

Chakma Autonomous District Council (CADC)-a MDC ngah ber ni ta ZPM MDC 10-te chuan CADC-a sorkarna siam thei an nih thu vawiin khan Larsap Dr Hari Babu Kambhampati hnenah an hriattir.

ZPM MDC 10 te hi ZPM Legislature Party Leader Mohan Chakma leh Deputy Leader Doymoy Chakma hovin an kal a, thudawn danin Larsap hian thuthlukna a siam vat dawn nia hriat a ni a, MDC te hi ZPM Vice President Pu VL Zaithanzama leh Political Adviser to CM Pu Lalmuanpuia Punte ten Raj Bhavan ah hian an tawiawm a ni.

ZPM General Headquarters President Pu Lalliansawta chuan Inrinni khan ZPM pisa-ah an party zawm thar CADC MDC 5-te lawmluhna hun a hmang a. Heti hian CADC-ah ZPM Party chuan MDC 5 a neih sa tawhte leh tuna MNF MDC 5, ZPM rawn zawm thar mi 5 te nen MDC 10 a nei ta a, CADC-ah MDC ngah ber party a lo ni ta a ni, a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

CHERRY BLOSSOM

Tlaizawng leh Khawpuitan Hapta chu naktuk atangin Chawngtlai khuaah hman a ni dawn a.

Chawngtlai khua hian kum 2016 atang khan Tlaizawng Park lo siam tawhin, kumin hian a vawi khat nan Tlaizawng hapta hi an buatsaih a, naktuk hian hapta hawna hun buatsaih tura ruahman niin he Tlaizawng haptaah hian Tlaizawng kunga dawh ngei leihkapui photo booth engemaw zat a awm dawn a, tlawhtute leh thlalak lama tuimi te tan a man hla hle tur a ngaih a ni.

Hei bakah hian Adventure lam tui mite tan Mizo history a hmun pawimawh tak luahtu, Khawpuitan tlangdung feet 5600 chuang a sang, kilometre 5 dawna thuih Trekking Route mumal tak siam a ni a, khamchhengchhe tak tak leh khambang tial mawi tak takah te trekking tiin a chet tlat theih dawn a ni.

(Naktuk atanga neih tura ruahman Tlaizawng leh Khawpuitan Hapta chu Chawngtlai khuaah hmang turin inbuatsaihna peihfel thawkhat tawh a ni a, hei hi Mizorama vawi khatna tur niin December ni 23 thleng neih tura ruahman a ni.

Chawngtlai khuaah hian khualzin mite tan hmun nuam tak tak siam a ni a, intihhlimna Carnival leh Stall hrang hrang siam niin hmun nuam tak tak buatsaih a ni bawk.

Chawngtlai hi kum 2014 khan Mizo Historical village a lo vuah tawh niin Khawzawl District chhunga awm a ni a, Mizo Historical Village a nih angin Mizo Pipute sulhnu leh hmun hlui tam tak hmuh tur a awm a ni.

Lalsangpuii Akashvani News Khawzawl)

<><><>

WINTER FESTIVAL

Mizoram Sawrkar Tourism Department buatsaih Winter Festival 2024 chu Aizawl Sipai Lammualah vawiin khan Tourism Minister Pi Lalrinpuiin a hawng.

Hawna inkhawmah thusawiin Pi Lalrinpuii chuan Mizoram chu India ram state dangte nena khaikhin pawhin Tourism sector-a theihna leh remchanna ngah ber pawl a ni a, hei hi hre renga sawrkar hmalaknate tun anga thlawp chhonzawm zel turin mipuite a sawm nghal bawk a ni.

Winter Festival 2024 hian tun thla December ni 21 thleng a awh dawn a. Festival hi Lammual mai bakah Reiek leh Hmuifangahte neih a ni dawn a ni.

Winter Festival pual hian Exhibition Stall leh Food Stall thahnem tak buatsaih tel a ni.

<><><>

WE WILL NOT ALLOW OUR LAND TO BE USED AGAINST INDIA: LANKAN PRESIDENT DISSANAYAKE

Sri Lanka President Anura Kumara Dissanayake chuan India dona atan kan ram kan phal ngai lovang a ti.

Vawiin khan Prime Minister Narendra Modi-a leh India-a rawn zin Sri Lanka President Anura Kumara Dissanayake chu an inkawm a. Ram pahnih inkara thawhdunna tur chi hrang hrang an sawi dun.

An inkawm hnuah thuchhuah siamin Prime Minister chuan Dissanayake-a'n a president hnu-a a ram tlawh hmasak berna atan India a thleng chu lawmawm a tih thu a sawi a. Hei hian ram pahnih inlaichinna atan rah thar a chhuah ngei ang a ti.

Dissanayake-a chuan Prime Minister hnenah chuan India tana pawl tur zawngin eng kawngah mah an ram hman an phal loh tur thu a hrilh a. India leh Pakistan inkungkaihna chu a par vul zel ang a ti baw.

<><><>